



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma : Tir Yimym

tiryimym@aolima

tir yimym

TAPAK 3

Alexei Navalny tasimang Moscow nung Hokulbarnü aremtsü

Gaganyaan space flight mission atema PM Modi-i astronaut tem tenung sangdongogo



VOL. XXI ISSUE NO. 137 (ADOK 137) DIMAPUR YANGTEPNÜ (THURSDAY) TSÜKLAI (FEBRUARY) 29, 2024 ₹ 5.00

Diezephe aser Tsithrongse atema Peace Committee tentet

Dimapur, February 28, 2024 (TYO): February 2, 2024 nü Diezephe aser Tsithrongse tsüingda arrtsü mangatettep adokba atema Tenyimi Union Dimapur (TUD) aser Eastern Nagaland Peoples Union Dimapur (ENPUD) senden ka menogo.

Senden nung Diezephe aser Tsithrongse tsüingda küm 35 tashi mangatettep aruba ken o angatetteptsü atema luden ka tentet.

"Peace committee for

Diezephe & Tsithrongse Village" nung TUD President Vekhosayi Nyekha-i Convenor aser ENPUD President L. Shahoto Yimkhiungi Co-convenor inyaksü shimtet.

Iba committee tentetba sülen parnoki February 14, 2024 nü yimtsüing anaprong semdangogo aser ketdangpurtemi Peace Committee nem tezüluba nung ken o angatetteptsü nangzükogo.

Peace Committee nung yimtsüing anaprong nungi züingsem pungugu shimoktsü lemtet.

Sorkari KPC building yanglutsü: CM Rio

Kohima, February, 28, 2024 (TYO): State sorkari küm ka tsüingda Kohima Press Club (KPC) atema ki ka yanglutsütsü ta Nagaland Chief Minister Neiphiu Rio-i nangzükogo.

Mongulbarnü Assembly Committee Room nung osangbener den jembidang osangbeneri Journalist Pension Scheme atema asüingdangang Rio-i KPC atema single storey building yanglutsütsü osang metetdaksü.

"Sorkari Press Club atema ground floor aser first floor yanglutsütsü. Iba ya pre-fabricated house asütsü aser küm ka tsüingda yanglutsü" ta Rio-i ashi.

"Chief Minister Neiphiu Rio-i KPC asoshi Press Club building ka yanglutsütsü ta otsütsütsü aketba sangdong pelashishia agizüker. Iba ya New Secretariat area nung sorkari lemzüksüba kimung nung yanglutsü" ta KPC president Alice Yhoshü-i ashi.

"Nagaland nung Press Club tejentiba süaka aser state yimtiba nung liaka KPC küm 23 tashi arudang permanent mesüra temporarily-allotted government building ka dang mali" ta lai ashi.

Iba tebilemstü ya KPC-i sorkar aika den lemsatapa aruogo. Talisa kidanger state tem nungbo Press Club tem nem state sorkari logistics support aika aser teyari aika agütsür, ta Alice-isa ashi.

Chief minister-i iba sangdong agütsüba ajanga democracy nung Fourth Estate ajanga tongti shilem agiba agizüker ta tang aliba sorkari agizükba lir ta laisa metetdaksü.

"State sorkari Press Club building tasenbaji state yimtiba nung Media Centre tajung ka kümdaksütsü aser tanga district o state tem nung aruba journalists asoshi facility balala densemstü imlar" ta KPC president-isa ashi.

Mizoram sorkari Indo-Myanmar arrtsü bangzüing renem

Aizawl, February 28, 2024 (Agencies): Mizoram legislative assembly-i Bodbarnü Indo-Myanmar arrtsü atsüdangba aser Myanmar den Free Movement Regime (FMR) agienba anema bangzüing ka renemogo.

Iba onük ya Home Minister K. Sapdanga-i benok aser parnokisa Narendra Modi-i aniba sorkar dang Zo nung külemi alitsü atema mapa inyaksü ayongzükogo.

British yimsüsüba divide-and-rule policy ajanga Zo nung linük balala nung lemsar lir anungji administrative unit ka kübok longjemtsüla ta Mizoram Assembly-i metetdaksü.

Zo nung ya alemli nungi Mizoram aser Chin hills nung liyonga arur aser administration ka kübok dang liasü saka British nung aruba sülen India nung Myanmar bendangtsü, ta K. Sapdanga-i ashi.

British nungeri Indo-Myanmar arrtsü lazüksü aser Zo nung linük balala ana nung lemdang ta pai ashi.

Zo nungeri Indo-Myanmar arrtsü magizüker kechiyong iba ya British nungeri tashiyim agi inyakba lir. Zo nungeri künübo administrative unit ka kübok tanaben longjemtsü bilema arur, ta home minister-isa metetdaksü.

Indo-Myanmar arrtsü atsüdangba mesüra FMR agienba ya Zo nungeri magizüker ta Sapdanga-isa ashi.

India kübok state pezü-Mizoram, Manipur, Nagaland aser Arunachal Pradesh-i Myanmar den kilometre 1,643 agi arrtsütepa lir.

Mizoram-i Myanmar kübok Chin state den kilometre 510 agi arrtsüa lir aser Mizo nung ya Chin nung den azü agi sosema lir.

NSF-i state sorkar dang ILP system akangshitsü akhanger

Dimapur, February 28, 2024 (TYO): Naga Students' Federation (NSF)-i Nagaland sorkar dang Inner Line Permit (ILP) system tenzüksü metetdaksü.

Taoba mapang Dimapur District nung ILP anena ataba atema tebilemstü abener aser ozüing alema arurtemi lisopurtem nütüing yongsük atema timtem bentsür arutsü ana nung lir ta NSF-i ashi.

"ILP system ajanga küm noklang ka tema tourist aruba tiptemer aser ozüing alema arur noktanga arur. Ajisüaka tesüiba küm Ishika tsüingda ILP mapa shitak meinyaker aser iba ajanga

lisopur maitsü aser sobaliba menentsüogo" ta NSF-i Chief Secretary dangi züluba shidi ka nung ashi.

"February 27 aser 28, 2024 tashi NSF-i ILP verification drive agidang taoksatsü aketba osang aika bushitetogo. Iba mapang ILP defaulters 637 apu aser ILP Zone telungi maitdaksü. Maneni nisung aikati ILP nungdakba memetetba bushitet aser iba ya sorkari anir awareness campaigns magiba ajanga lir" ta NSF-i ashi.

Dimapur District (erstwhile) nung ILP ketdangtsü atema Cabinet Sub-Committee ka tentet saka parnoki züingzüksüba

mapang tsüingda report magütsüba atema mepelar aser iba ajanga sorkari züingzünga meinyakba sayur, ta NSF-isa ashi.

Dimapur District (erstwhile) nung ILP suspension order meyipa agitsüla, tongtipang entry points nung ILP Monitoring Cells amenoktsüla, district headquarters ajak nung ILP mapa akangakanga inyaksüla aser ILP defaulters ozüing tapet agi merenshitsüla ta NSF-isa state sorkar nem takhangba onüktem agütsüogo.

NSF-isa ILP indang awareness campaigns ayonga agitsü ayongzük.

PM Modi-i anogo ana atema Assam semdangtsü

Guwahati, February 28, 2024 (Agencies): Prime Minister Narendra Modi-i March 8 nungi anogo ananü Assam semdangtsü aser iba mapang pai Kaziranga National Park nung jungle safari ajangshitsü.

PM Modi-i March 8 nikongdang Kaziranga atongtsü aser idakji aonung ka yipzüksü.

Tasüingnep pai KNP telongtet nung jungle safari ka nung senzüksü aser iba sülen

Jorhat-i aotsü.

February 27 nü Forest and Environment Minister Chandra Mohan Patowary-i Kaziranga National Park semdangogo aser ketdangsurtem den sendentem amen.

Paisa Assam Chief Secretary Paban Borthakur aser Director General of Police (DGP) GP Singh na den Prime Minister-i semdangtsü aliba atema osangtsüsang lemsatap.

March 9, 2024 nü PM Modi-

i Jorhat nung Ahom general Lachit Barphukan indang kürazyanglu ka sayatsütsü. Yongmen yin agi yangluba kürazyanglu ya feet 125 talang lir.

Paisa Sivasagar Medical College atema lung azüingtsütsü aser Pradhan Mantri Awas Yojana (PMAY) kübok ki lakh 5.5 yangluba lapoktsütsü.

Prime Minister Modi-i Jorhat kübok Meleng Meteli Pothar nung lokti sentong ka nung o jembitsü.

Nagaland nung mezüingbuba UPVC factory lapokogo



Kohima, February 28, 2024 (TYO): Tourism & Higher Education Minister Temjen Imna Along-i Bodbarnü Sweba Viswema nung Urban Home Solution lapoktsüogo.

Urban Home Solution (UHS) kibur ya Sedi Kechü lir aser iba ya Nagaland nung mezüingbuba Unplasticised Polyvinyl Chloride (UPVC) Factory lir.

"Nisung aika ket nung shishilembatsü sen mali ta nisungtemi jembir aser tsüraburtemi lapoktsüba shishilembabaren tanurtemi

südaktsür kechiyong parnok dak shisatsü mali mesüra takok angutsü atema memeranger" ta Minister Along-i ashi.

"Sedi Kechü ya kanga meranga inyaker ka aser pai tayongzükbatem asoshi renema lir. Lanurtem ajemalutsüla, tangatetba shitak ayutsüla aser mapang den putepa alitsüla" ta pai ashi.

"Asenok ajak tayongzükba balala lir saka asenoki aremzüka takok angutsü merangtsüla. Nagaland nung lanur entrepreneurs-i meranga inyaksü yimya sübatsüla" ta Along-isa

ayongzük.

Sedi Kechü-i UPVC factory ya tanga tesemtem aser district tem nung razüka aotsü imlar ta paisa ashi.

"Nübertem nem products tajung agütsütsü tangatetba nung factory lapoker. UPVC products ajak water proof, anti termite, low maintenance, sound proof & good insulation lir" ta UHS kibur Sedi Kechü-i ashi.

Iba ya kichiba, kishi aser jara atema kanga junger, ano glazing mapa mashie ka nung amshiteter, ta pai ashi.

DIET Pfutsero ajanga school health indang workshop ayongzük



Dimapur, Tsüklai/February 28 (TYO): District Institute of Education and Training (DIET), Pfutsero ajanga Pfutsero jila nung aliba school tesayurtem atema school health and wellness atema workshop ka

February 27, 2024 nü ayongzüka liasü. Iba workshop nung shisalen sayurtemi School Health ajanga kaketshirtem asoshi tongti shilem agiba indang lemsatepa liasü. Temesepba mozü achiba

asertekolok nung timtem ajuruba angateta iba workshop nung shisalen sayur ya Thepuveyokezo aser Ravolu Tetseo liasü. Iba sentong ya Sonu Katiry aser Joyce Lea na lenisüba nung agia liasü.

Assam Rifles temi state nung sentong balala ayongzük

Dimapur, Tsüklai/February 28 (TYO): Assam Rifles temi Operation Sadbhavna kübok February 28, 2024 nü Tuli nung Veterinary Camp ka angati ayongzüka liasü.

"Inspiring Today's Youth for Tomorrow's Leadership" omen nung ajemdaker iba sentong ya tarutsü nung lenirtem asoshi yimya tajung angazükdaktsütsü nükjidong nung ayongzüka liasü.

Iba sentong nung Pungro jila nung aliba Mt. Horeb School nungi kaketshir 52 den tesayur ana arua dena liasü. Assam Rifles temi kaketshirtem sempet salatsü aser teamwork adokdaktsütsü, temang anema alitsü atema maparen balala yanglua aliba nung parnoki shilem agia liasü.

Iba sentong nung azü aser tanü kibur nem mozü angati lema agütsü aser shiruru asoshi seasonal flu, item timtem nungi nokdangtsüba, livestock hygiene aser sanitation indang angazükdakja liasü.

Iba camp nung kiset shiruru 500 dak tema anepalua liasü. Pungro COB nung aliba Assam Rifles temi kaketshir nem maongka agüja anogo ka Company Commander den mungdaktsü.

Anogo tepiyong maparen balala nung shilem agiba sülen sempet lema agütsü aser Company Operation Base, Pungro nung chiyongtepa liasü. Maneni February 28, 2024 nü Assam Rifles temi Kiphire district kübok yimtsüng toku nungi lenirtem den Security Coordination meeting ka mena liasü.

Iba den külemi Assam Rifles tem liyonga aruba indang video tem sayu aser Assam Rifles tem den külemi national anthem tena

Region nung security tali tajungba akumtsü aser nüburtem tsüngta telungjem tali adokdaktsütsü nükjidong nung iba senden ya Assam Rifles ajanga "Strengthening Community Vigilance for a Safer Tomorrow" omen nung ajemdaker ayongzüka liasü.

Solar-based storages amshiba indang workshop agütsü



Dimapur, Tsüklai/February 28 (TYO): Nagaland nung meta tezülen solar-based storages amshiba aser tajangzük balala anguba indang workshop ka Ministry of DoNER kübok North Eastern Regional Agricultural Marketing Corporation Limited ajanga February 28, 2024 nü Conference Hall, Directorate of Horticulture nung ayongzüka liasü. Iba workshop ya Directorate of Horticulture, Nagaland ajanga yaria ayongzük.

state sorkari sentong aser atema solar energy amshitsü sentong kar pai benoka liasü. Technical session mapang Ecozen Cold Storage Solutions nungi Abhirup Basak aser Rohit Bhartwaj nungeri solar-based cold storage systems nungi tajangzük anguba aser amshiyim indang rateta ashi.

Marketing aser chiyongtsü/ osettsüset wazüka ayuba, talisa shisa aoba aonsotsü aser süngjang-lijang mapang talanglang wazüka ayuba nung timtem ajurubatem bentettsü indang Meyasashi-i ashi. Post-harvest management interventions kanga tongtipang ta ashi aser Department-i Nagaland nung post-harvest losses ajemdaktsütsü asoshi tapet technology bushiba nung rangloker inyakba indang metetdaktsü.

Iba sentong tenzüka jembidang Director, Horticulture Department, Meyasashi-i Nagaland nung küm 20 tsüngta horticulture melenshia aruba indang ashi. Government of India aser

Iba workshop nung state tesem balala nungi aluyimer, Horticulture Department nungi ketdangsurtem, North Eastern Regional Agricultural Marketing Corporation Limited nungi teshimtet nisungtem nungi shilem agia liasü.

FPS purtemi nisung ajak eKYC asütsü melatsüla

Dimapur, Feb.28 (TYO) : Fair Price Shop nungi jangotsü alirtem shia tan February 2024 ita tashi nungsa eKYC asütsü mapang lateta agüja lir, anungji FPS kiburtemi pei dokan tenüng nung zülüoka malirtema tanga FPS nung tenüng lira, item teyari angurtem ajak FPS mashi ka nung eKYC asütsü melatsüla ta sangdong ka ajanga Nagaland

Food & Civil Supplies, Director W b . C h u b a w a t i i metetdaktsüogo. Kasa sangdong nungsa NfSA nungi teyari angurtem ajak mashi FPS nung eKYC asütsü atema Ministry of Consumer Affairs, Food & Public Distribution department, Govt of India nungi tejanga metetdakja lir ta paisa ashi.

Botsa anasa nisung tasü mang ka nguteta lir

Dimapur, Tsüklai/February 28 (TYO): Kohima district nung Chiephobozou PS kübok Botsa anada February 28, 2024 nü mejangjaba nisung (tebur) tasü mang ka ngutet, ta sangdong ka ajanga ashi.

Ozüng agi melaba maparen ajak tembangba sülen tasü mang ya tali jangjatsü atema North Police Station indang morgue nung yua lir.

Iba nisungba ya arishi küm 40-45 tsüngta, sentsü tammang, tar feet 5.1, blue jeans shirt aser white printed jogger pant semer liasü.

Kibur, kinungr, tembar temi Officer-in Charge Chiephobozou Police Station, Kohima den mobile number 9436010032 ajanga jembitsü akok, ta sangdong ajanga ashi.

Ock nung Faculty Development Programme agi



Kohima, Tsüklai/February 28 (TYO): Oriental College Kohima nung Bodhbarnü "Language and Empathy" onük nung Faculty Development Programme ka agia liasü.

jangjateter, tali tajungba nung dangar den sensamsemteter aser lenmang nguteter ta ashi.

Iba sentong nung shisalen sayur Vibha Lakhera, Founder, Project Empathy liasü.

Dangar nem tatok agütsüetba nung Empathy ya tongtipang mera ka lir aser nüburtem tali telungjemba kumdaktsür ta lai ashi.

Lai sentong nung jembidang Empathy indang rateta ashidang iba ya ajanga pei nungdakba aser dangar nungdakba

Iba sentong ya tesayurtem sempet tali arangshitsü aser academic tali tajungba kumdaktsütsü nükjidong nung ayongzüka liasü.

Wokha nung Parikash Pe Charcha benjong amung

Dimapur, Tsüklai/February 28 (TYO): State Commission for Protection of Child Rights, Nagaland aser State Council of Educational Research & Training, Nagaland lungjemer Fernbrook School, Wokha nung February 28, 2024 nü Pariksha Pe Charcha (Festival of Examination) benjong munga liasü.

tajungtiba nung aziöktsü asoshi jembishinütsü nükjidong nung iba sentong ya ayongzük.

Iba sentong nung Nagaland State Commission for Protection of Child Rights (NSCPCR) chairman Alun Hansing-i jembidang, kaketshir, tsürabor aser tesayurtem tebilemstü khuret mali indaktsütsü mechi Ato Kilonser Narendra Modi-i anir inyakba nung Pariksha Pe Charcha ya shilem ka lir ta ashi.

Tatidang results madokdang kaketshir, tsürabor aser tesayurtem shisabolua bilemba ajemdaktsütsü aser iba tangatetba melenshidaktsütsü nükjidong nung Pariksha Pe Charcha sentong ya ayongzük, ta ashi.

Iba amala sentong ya kanga tongtipang, anungji tanur shia yimya aser sempet balala aliba benjonga pei sasa pei tebilemba shitettsüsa environment adokdaktsütsüla, ta Hansing-i ashi.

Iba sentong nung shisalen sayur ya Akumla Longchari, Member, NSCPCR, aser Dr. Zavise Rume, Professor, SCERT, Nagaland liasü.

Tatidang dak sendakba shisabolua khuret koktettsü atema tanurtem yaritsü aser tatidang mapang shisabolua

Parnoki Pariksha Pe Charcha nükjidong aser tasa balala lemsatepa liasü.

Parnoki tatidang yimya shidak nung angatettsü, tatidang tebilemstü aziöktsü aser jangratema angazüksü indang tasa balala sayua liasü.

Tatidang tebilemstü koktettsü asoshi Government of India-i sentong balala tenzüka aliba indanga parnoki lemsatepa liasü.

Iba sentong nung Wokha district kübok school balala nungi tsürabor aser tesayurtem arua dena liasü.

Himachal Pradesh nung Congress sorkar anokshir



Shimla, February 28, 2024: Bodhbarnü Himachal Pradesh Legislative Assembly kima Congress aser BJP nung inyaktertem aika adenshiba sülen tensa azüoktsü atema security sepaitem yokba sülen tangokba noksa nung angur.

Shimla, Tsüklai/February 28 (Agencies): Himachal Pradesh nung Rajya Sabha election agidang Congress MLA temi tanga party nem vote agütsüba aser minister, Vikramaditya Singh-i anenba sülen Congress sorkar anokshi tenzükogo.

BJP-i, Rajya Sabha election nung Congress MLA temi tanga party nem vote agütsübaaji ajanga Chief Minister Sukhvinder Singh Sukhu-i aniba sorkar nung züngsem ajemba sayur, ta aitsüogo.

Himachal Pradesh nung Opposition Lenir, Jairam Thakur-ia Chief Minister Sukhu-i menden nungi anentsüla, kechiyong Congress sorkar majority masü, ta ashi.

Thakur-isa Speaker, Kuldeep Singh Pathania-i BJP MLA 15 senden nungi anentsüba atema aitsü.

Jairam Thakur-i state Angh, Shiv Pratap Shukla ajurua BJP MLA tem tim mesüi anentsü, ta shiogo. House nungi anentsüba MLA tem rongnung Jai Ram

Thakur, Vipin Parmar aser Randhir Sharma nungerdensema lir.

BJP-i ashiba agi, Congress MLA trok aser independent MLA asema Rajya Sabha elections nung BJP candidate nem vote agütsü.

Jairam Thakur-i, Chief Minister Sukhu-i pa menden nungi anenogo, ta metetdaksü ajisüaka Chief Minister-ibo iba osangji tai ta shiogo.

Ano külen Congress General Secretary, Priyanka Gandhi Vadra-i, Himachal Pradesh nung nüburtemi shimtetba sorkar chirepdaktsü atema BJP-i tashiyim, sen aser sorkar machinery amshir, ta tai tongloksü.

Rajya Sabha election nung BJP candidate, Harsh Mahajan-i takok anguba sülen state nung yimtenren anokshir. Iba tensa kümzüktsü atema Congress lenir ana- DK Shivakumar aser Bhupinder Singh Hooda na Shimla tonga ogo.

State minister aser taoba

mapang Chief Minister Virbhadra Singh'er jabaso, Vikramaditya Singh-ia Council of Ministers nungi anenba ajanga Congress atema ano jenjang tamajungba aküm.

Tang India nung Himachal Pradesh densema state asem nung ang Congress sorkar lir. Himachal nung Congress sorkar chirepra party sorkar aliba tesemji South India dang asütsü, kechiyong Congress sorkar aliba Karnataka aser Telangana na ya south tsütsülen lir.

Taoba mapang Himachal Chief Minister, Virbhadra Singh ya chief minister trokben tashi inyak aser Union minister asemen tashi inyaka liasü. 1980s mapang nungi Virbhadra Singh ya Congress nung kanga tongti lenir ka liasü aser pa ajanga Himachal nung Congress longjema liasü. Pa süadokba sülen CM menden atema pa kinüngtsü, Pratibha Singh meshimba ajanga tang state nung Congress sorkar anokshir südi, ta bilemer.

MCC metenzük dang sorkari CAA ozüngtem sangdongtsü

New Delhi, Tsüklai/February 28 (Agencies): Narendra Modi-i aniba NDA sorkari March ita mezüngbuba hopta nung Citizenship Amendment Act (CAA) ozüngtem sangdongtsü.

Lok Sabha election atema model code of conduct (MCC) mebenok dang Ministry of Home Affairs (MHA)-i CAA ozüngtem sangdonga benoktsü. 2019 küm lokti tenet balalai CAA anema longkak aitba ajanga CAA dak sendakba ozüngtem mesangdongi aruogo.

CAA kübok, Bangladesh, Pakistan aser Afghanistan nung reshikangshi ajanga 2014 küm

December 31 anogo tashi nung India-i arua jenoka aliba Hindu nung, Sikhs, Jains, Buddhists, Parsis aser Khristantem nem India senso agütsütsü.

MHA-i CAA ozüngtem sangdongba sülen temsüa alirtem nem India senso agütsüba maparen tenzüktsü, ta osang ka ajanga metetdaksü.

Iba maparen atema sorkari online portal ka renemogo aser iba portal ajanga CAA dak sendakba maparen ajak inyaktü.

Yaküm December 27 nü Union Home Minister Amit Shah-i, CAA ya linük ozüng lir, anungji shingaia iba ya

nokdangtsü makok, ta metetdakja liasü.

Ministry of Home Affairs-i ashiba agi, April 1, 2021 nungi December 31, 2021 tashi nung Citizenship Act, 1955 kübok Pakistan, Bangladesh aser Afghanistan nungi nisung 1,414 nem India senso agütsüogo.

Citizenship Act of 1955 kübok Pakistan, Bangladesh aser Afghanistan nungi arua state 9- Gujarat, Rajasthan, Chhattisgarh, Haryana, Punjab, Madhya Pradesh, Uttar Pradesh, Delhi aser Maharashtra nung jenoka alir 1,414 nem India senso agütsüogo.

Centre sorkari Jammu and Kashmir nung telok ana anentsüogo

New Delhi, February 28 (Agencies): Centre sorkari Jamaat-e-Islami Jammu Kashmir telok anenja aliba anogo küm 5 atsülangba sülen Bodhbarnüa Jammu & Kashmir nung aliba telok ana- Muslim Conference Jammu and Kashmir (Sumji faction) aser Muslim Conference Jammu & Kashmir (Bhat faction) na ya ozüng alema tentetba telok, ta sangdongogo. Bodhbarnü Union Home

Minister, Amit Shah-i X ajanga iba osang sangdonga liasü.

Amit Shah-i, Ato killonser Narendra Modi-i aniba sorkari kiralongra tera nungi atsüdoktsü atema inyaker, aser ozüng alema inyakba nung shilem agir ajak anema inyaktü, ta metetdaksü. "Kiralongra networks anema inyakba dak sendakba nung sorkari Muslim Conference Jammu & Kashmir (Sumji faction) aser Muslim

Conference Jammu & Kashmir (Bhat faction) na ya ozüng alema tentetba Associations ta sangdonger," ta Home Minister-i metetdaksü.

"Item telok ana yagi linük nüchiso anema inyakba nung shilem agir," ta paisa shisem.

Mongolbarnüa sorkari Jamaat-e-Islami, Jammu Kashmir (JeI) ya linük security atema amokmeren ka lir, ta shia ano küm pongu nokdangogo.

Party troki 2022-23 küm anguba income osang metetdaksü

New Delhi, February 28 (Agencies): Yimtenren party troki 2022-23 küm sük nung parnok i anguba senotsü osang metetdaksüogo; iba küm sük nung national party 6 jagi sen crore 3,077 jungnüa ngua liasü, ta Bodhbarnü Association for Democratic Reforms (ADR)-i metetdaksü.

2022-23 küm sük nung income teimba anguba party ji BJP lir; parnok i sen crore 2,361 shi angu.

2022-23 küm sük nung anguba income shilem 76.73 bo BJP-i anguba lir; tanabuba nung Congress-i sen crore 452.375 angu aser ibaji party troki anguba income nungi shilem 14.70 lir.

BJP aser Congress party na dak alia BSP, AAP, NPP aser CPI-M party temia parnok i anguba income sangdongogo.

Financial Year 2021-22 aser 2022-23 medemdangra BJP income shilem 23.15 agi teimba aküm, ta ADR-isa metetdaksü.

NPP income shilem 1502.12 agi teimba aküm, kechiyong FY 2021-22 nung parnok i sen sen

lakh 47 dang anguba nungi FY 2022-23 nungbo sen crore 7.562 angu.

Iba denji kasa AAP income-a shilem 91.23 agi teimba aküm.

FY 2021-22 aser 2022-23 nung Congress, CPI(M) aser BSP party tema income shilem 16.42 (Rs 88.90 crore), shilem 12.68 (Rs 20.575 crore) aser shilem 33.14 (Rs 14.508 crore) agi teimba aküm. Party trok jagi income osangji Election Commission nem agütsüogo.

BJP-i income sen crore 2360.844 anguba nungi shilem 57.68 (Rs 1361.684) dang indok, ta Election Commission nem metetdaksü.

Congress party-i income crore 452.375 anguba nungi crore 467.135 indok aser teindokbaji shilem 3.26 agi teimba lir.

CPI(M)-i income crore 141.661 anguba nungi crore 106.067 indok aser AAP-i income crore 85.17 angu saka teindokbabo crore 102.051 liasü; tetezü parnok i income anguba nungi shilem 19.82 agi teimba indok.

Gaganyaan space flight mission atema PM Modi-i astronaut tem tenüng sangdongogo

New Delhi, Tsüklai/February 28 (Agencies): Ato Kilonser Narendra Modi-i Mongolbarnü, India indang mezüngbuba space flight mission, Gaganyaan atema training agia aliba astronaut pezü tenüng sangdongogo.

Astronauts pezü ya Indian Air Force (IAF) group captain Prashant Balakrishnan Nair, group captain Ajit Krishnan, group captain Angad Pratap aser wing commander Subhanshu Shukla nung lir.

Astronaut tem ya Gaganyaan mission atema Russia aser India nung facility tem nung küm pongu tashi training agia arudar.

Kerala yimtiba anasa Thumba nung amenoka aliba Vikram Sarabhai Space Centre (VSSC) nung sentong ka nung shilem agiba mapang PM Modi-i, Astronaut pezüprongla nem astronaut wings agütsüogo.

"Parnok ya tenüng mesüra maitsü pezü dang masü, parnok yagi linük nung nütsünyongsük billion 1.4 tejangraba tenüng nung nokdaker," ta astronaut tem metetpelaba mapang Modi-i ashi.

"Küm 40 dak tema lir külen India tanaben anünglaki atutsü. Ajisüaka tangbo launchpad,

rocket aser countdown ajak asenok indang asütsü," ta pai ashi.

Vikram Sarabhai Space Centre semdangba mapang PM Modi-i sen crore 1,800 alang space infrastructure project tongtibang asem lapoktsüogo.

Project tem rongnung Satish Dhawan Space Centre, Sriharikota nung 'PSLV Integration Facility'; Indian Space Research Organisation (ISRO) Propulsion Complex, Mahendragiri nung 'Semi-cryogenics Integrated Engine and stage Test facility' aser VSSC nung 'Trisonic Wind Tunnel' densema lir. Paisa, Gaganyaan mission koda renloka odar iba indang asadanga liasü.

Gaganyaan mission ya India atema mezüngbuba human spaceflight project lir, koba anüngi nisung asem yoka parnok tekümzükba kübok alimai meyipa anir alua Isro indang human spaceflight capability sayutsü nükjidong nung tenzükogo. Tatembangbuba mission nung astronaut asem dang anünglaki atutsü.

Astronaut tem anünglaki meyok tsüngda space agency-i, parnok kechi timtem makai tur meyipa alutsü atema tetendangba balala agitsü.



February 28, 2024 nü Thoothukudi nung Tamil Nadu Angh, R.N Ravi-i Ato kilonser, Narendra Modi agizük dang tangokba noksa nung angur. Bodhbarnü Thoothukudi nung Modi-i terenlok project aika semzüktsüogo.



TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 29, 2024

Jangotsü tajungba alemer

Tawa Nagaland nung ochimashiba mapatem mita bushisüngdang telok kati Food & Civil Supplies department purtemi kerosene shitak malemba indang bushiteta yimjak nung metetdaksüba jagi, Nagaland nunga tanga state nung benshiba ama jangotsü alemba maparen (Public Distribution System) ya technology inyakyim ajanga inyaksü rongdak nungdak ka repringtetogo. Atangji, India ajunga nung "One Nation, One Ration Card" inyakyim tenzükba ajanga government nungi Fair Price Shop ajanga jangotsü teyari angurtem ajak anisüngzük tulu ngudagi. Iba inyakyim yagi India nung koba state aser koba tesem nung lidir liaka government nungi jangotsü teyari angutsü langa alirtembo kasa ration card nungi mashi Fair Price Shop nungi angutsü. Iba yagi tesem balala nung ayanga jajartem kanga yarir, kechiyong parnok kong lidir yangji, kasa ration card nungi jangotsü alitetter. Akhidangbo,pei alidak dang pei meyong ration card amshitet aser ketdangsertemia tom nung jangotsü agizüka yokdokba otsüa liasü. Aji oda, government nungi jenjang ajemer sensakertem dang Fair Price Shop nung ayoksü yokba jangotsü ketdangsertemi tom nung agizüka ayokba kasa jang bazaar nung nübortemi memeteti sen tasak agi alia chiyonga arurtemji asenok lir. Atangji, alima nung nisungi dang inyaker asünungji, ochimashi inyaksü jangrartem asoshibo inyaktettsüa lenmang alitsü, ajisüaka tangbo FPS nung jangotsü alirtem ajak bimometric mesüra Aadhar card ajanga dang tenüng zuluokdaksür aser jangotsü agizükba aser ayokba ajak ePOS (Electronic Point of Sale) ajanga ayoker, anungji oagi jangotsü yokertemi repringa jangotsü agizükba aser ayokba mapatem inyaker. Iba inyakyim jagi teyari angutsü purtem ajak mapang shitak nung jangotsü tajung shitak nguya alitsü. Aji oda, PDS ajanga jangotsü teyari angurtem shitak jangjatsü aser shitak shitak lemsaa agütsü atema tang Ministry of Consumer Affairs, Food & Public Distribution department, Govt of India-i nisung shia tenüng jangjashitsü atema eKYC inyakyim nung pei tenüng, talidak aser temetettsü ajak ano khen bendendagi. Item mapa ajakji electronics agi computer nung inyaker. Aji oda, joko nisungi repringa alitsüba dak alaka nisung teka agi inyaksüba mapa aika mali kümdagi. Tanü putu nung nübortem dang ajungba yimten, Welfare government, ajanga sensakertem timtem nungi anitettsü asoshi inyakba sentong tajung rongnung nisung shia nem ita shia jangotsü angati agütsür amai jenjang dalang agi agütsüba ya asütsü. Atangji, kar nembo angatia agütsür. Aji oda, government nükjidongji iba ama sen tera agi mesüra angati anguba jangotsü ya chiajema mapa inyaksü asoshi teyari agütsüba sentong lir. Ajisüaka, asenokio iba PDS ajanga government nungi jenjang dalang agi anguba jangotsütemji chia jema kecha meinyak kidang munga kazütsü amai bilema alitsü. Ano, asenoksasa asenok dang asüngdangtsüba mapa kaji, FPS nung jangotsü sen dalang agi alitsü atema Ration Card ya peii inyakba agi pei bok mesüngtet alir sensakertem nem agütsür, ajisüaka asen lima nungbo FPS nung jangotsü agütsü nübo kimaji sünga gari anendena yur 'relief' jangji agizüka gari nung bener aor. Ibaji asangsang nung masü saka sentong ka nung jilushi ia sayur amai lir. Ibaji center nungi Food & Public Distribution department nung inyakertertemi angu nungbo kanga süngmanga bilemtesü. Atangji, asenok nem angati 'relief' jang agütsüba agi asenokbo mapa meinyaknü azümasen kümdaktsüogo. Ibaji asenok nem PDS ajanga jangotsü teyari yokba nükjidong masü. Sensakertem nem jangotsü teyari agütsüba ajanga sensakertem kecha balaka shisamebului pei lu inyaktettsü aser tetibo tangar dak nendaka melii alitsüa inyaktettsü atema ajungshiba mapaji PDS ajanga teyari agütsüba sentongtem ya lir. Item sentongtem ajanga ketdangsertema tai memena aser teyari angutsü purtem shitak angu ta asütsüa, tanünga inyakyim ajakji ano technology amshia inyakba inyakyimtem asütsüa.

OLEMSABANG

Lanurtemi 'Social Media' kümdanga amshitsüla

~ L.Kika Pongener

Tang asenok aliba putu ya kanga dang küra-a tejakleni aoba putu ka lir. Talisa, 'Media' ajanga alima ya kanga tilaka kümdaktsüogo. Aji oda, 'Modern Technology' & 'Internet' ajanga alima ya kanga küra-a renloka tejakleni aor, saka tip külen tanür aser lanur tain longlong mapang kanga kümdanga meita melira, iba 'Social Media' (Internet) yagi lanurtem taküm tia raksatsütsü ana nung lir. Social Media dak sentakba Facebook, Instagram, Twitter, Google, YouTube, Whats App, yamala yagi alima ajunga ya yimtsüng tilaka amai dang kümdaktsüogo. Anungji social media ya kanga kümdanga tim lenmang nung amshira, lenmang aisu nung asenok nem tajangzük agütsütsü, saka tim masüba lenmang nung mekümdangi amshira, mesura mapang telemtet ka maka, yimya dak talila amshira, iba yagi taküm tia dena raksatsütsü. Atangji, social media ya kanga kümdanga shisa kaa amshitsü kanga dang tongtipang, kechiyong social media ya tim masüba lenmang nung amshira, mesura mapang telemtet ka makai amshira, taküm nung takoksa jenti ajurutsü. Talisa, lanurtemi social media nem pei taküm manisadaktsütsüla aser memoksepdaktsütsüla.

Tesasatsüka, tanü asen lima nung lanurtem aika iba social media sabang tamshi mashi amshiba ajanga memeteti taküm tia raksadagi. Lanur aika anogo tepiyong social media den tembar kümer, sungo ajemtsüa mebilemer, chiyungtsüa mebilemer, pei temang meruk-mejua tzü chigotsüa mebilemer, oda yipden nungi saakba, room nungi madoki, anu kodang adoker kodang ayir memeteti, anogo suidaktsüba lanur aika lir. Internet nung 'Games' tapu-tapu asayadang khen bilemtesübo yiar küma-adok asü (?)...ta bilemtesüa, ammag-sangwa memeteti pa/la mejangba room nung dang anogo suidaktsüba lanur aika lir...Iba amaji taküm lisa-a aliba angudang kangasa meima repringer. Aji oda, mapang telemtet mekai Internet nung temulong ajunga agütsür, taküm lia ora, tanem-tanemi tekolok shisatsü nung minprongba tanela ka agi tim-atemtsü. Tanü asen lima nung lanur aso-ajen tajung, tobur tajung, nubu tajung, tekolok tajung, sempet tajung aketba, Degree tulu ngua zünger, aiur-asangur aika, social media sabang tamshi mashi amshiba ajanga taküm raksadagi. Anungji tsüraburtemi pei jala-jabaso kanga kümdanga meita repringtsüla.

Tanü putu nung Internet sabang balala nung pei sasa nungtuko akümtsü merangteper, konang-nungsang bushiteper, tangar dang nungi tajungba aser temaba asütsü merangteper. Pa/la den anidaker (Followers, likes, comments) aika asütsü tokteper, aser yamala sabang ajanga sen aika ajangzüka takar akümtsü merangteperba putu ka nung alir. Ajiser, pei indang Social Media sabang nungji tanidaker Follower, likes, comments aika melira tezüdang...Pei takümji kecha masüba, takitak makaba, jenjang makaba, tangar dang nungi kanga teküpokba jenjang amai, pei sasa ilaa bilema, karbo taküm raksatsüa timtema adoker. Tanga lima anuolen linuktem (Western countries) nung tangar kangasa temaba jenjang nung libaliroba, itemji ajizüka parnok amaji libalirotsü merangteper, parnok libaliro 'Life Style' jilo ajizüka parnok ama alitsü merangdang, pei sasa pei jaksu-pangsu soropangro agi temulong mesui bilema, karbo soseta asütsü (Suicide) tashia merangba timtema ajurur. Alima talang nung alir den 'Facebook' ajanga tembar yimteteta yur, anasa aliba chichiba tembar-to kecha jenjang mali sentokba yamala tensa tia-a ajurur.

Ano aji dang masü, Social media ajanga osangtsüsang tai prokshiba aser tiyazü olulu prokshiba ajanga nisung kar takümbo lendongi yidaktsür aser loktiliba dena makmakshidaktsür. Noksa tamajung prokshiba ajanga lanur aika jaklaliro menentsür, ano nisung kar temeden raksaja, parnok shi temang ajak mangsa (Naked) noksa prokshiba ajanga parnok maaksudakja tetla-tetshir. Ano lokti-tentet kar anema ken o tamajung zülutepba agi loktiliba nung mepetmesu adokdaksür. Aji oda, social media nung adokba ajakbo, chichiba (reality) nungbo kusaji masütsü akok...oda tangar poatsü (Attract) atema tobur junga yanglur yokba dang asütsü akok...Saka tanü lanurtemi Social media nung adokba ajakji shitak amai dang bilema, itemji ajizüka parnok amaji libalirotsü meranger, aser idangji asen sobaliba tajung aika senzüka toktsür. Tesasatsüka, tanü lanur aika Internet nem moksepdaktsür, pei tsürabur dena pilar, loktiliba nungi pilar, sentep-senji aotsüa mebilemer, aser oda pongmang lima nung alir ama taküm lisa-a aliba lanur aika lir.

Nisung ka taküm nung aiur-asangur tebenjem mapangji kanga dang senti mapang lir, iba mapangji yintsünger merang (Iron) mimong nung tsüker, merema tsüka aliba mapang, kechi koma tereprangtsü (Shape) ka yanglunur, iba amaji yanglutsü akokba mapang nungji akoshia yanglutsüla. Ibaji mesuka nisung ka taküm nung teyanglushitsüba mapang tajungtibaji lanur tebenjem mapangji asütsü. Anungji iba mapang nungji sayubentsü tajung shia, tim lenmang nung sayua, azüoka, anitettsüji tsürabur khuret lir. Tanü ama kanga küra-a tejakleni aoba putu nung tsüraburtema züba-züba-a alitsüba mapang ka masü, saka kanga jera-pera-a meita alitsüba mapang kati menepogo. Pei chirnur mejangba room nung kechi inyaker (?) Koleni aor (?) Kidangi meyipa shilang asü meshilang (?)...item ajakji kanga jera-pera-a meita repringa alitsüba mapang kati menepogo. Tanü asen chirnurtem atema asenok tsüraburtem khuret tulu lir ta metetdi. Aji oda, tang teinyaksü tim meinyaki mapang tajungji suidaktsüra, tarutsü aliba putuji kanga tetsübotsü-ka asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Nicaragua nung Khristan melungtet telok 342 anentsüogo



February 28, 2024: Nicaragua linük tesem ajaklen Evangelical Khristantem kanga amokmerener aser reshikangshir, ta meimchir temeden atema inyakba melungtet telok Never Again-i metetdaksü.

Tesüiba küm ana tsüingda Daniel Ortega-i aniba sorkari melungtet telok 3,500 dak tema anentsüogo aser item melungtet telok rongnung Khristan melungtet telok 342 densema lir.

Khristan melungtet telok 342 nungjagi Evangelical melungtet telok 256 aser Catholic melungtet telok 43 densema lir, ta parnokisa metetdaksü.

Evangelical associations indang melungtet telok teimbaka (183) 2022 küm anenja liasü.

Never Again co-ordinator, Wendy Flores-i, "Nicaragua nung Arogo reshikangshir, ajisüaka evangelicals ola madoki reshikangshir, kechiyong evangelical lenirtem kari sorkar pusemer aser aikati sorkar tsübuba agi sorkar anema ola madoker," ta metetdaksü.

"Sorkari tanem-tanemi evangelical associations aika anentsüogo. License magütsür aser bendanglen nungi senotsü agizüksü memelar. Sorkarisa Khristan melungtet teloktem indang bank accounts shibangtsür aser parnok meyong kiojen agiadoker," ta pai metetdaksü.

Reshikangshi aser amokmeren liaka Khristan melungtet teloktemi maneni mission mapa inyaker aser yimti aika nung tekülem

sentongtem agir.

Nicaragua nung nütsüing teimbaka Khristan lir. Nütsüing shilem 45 shi Evangelical Khristantem lir aser nütsüing shilem 45 shi Catholic Khristan lir.

2018 küm Nicaragua nung loktiliba aser yimtenren tsütsü mepetmesü adokba mapang nung Khristan lenirtem aikati sorkar anema ola adok aser lenirtem rongnung Rolando Álvarez bo tang tashi tepuokdak lir.

Never Again teloki ashiba agi, 2019 küm nungi 2023 küm tashi nung sorkari Catholic Arogo anema inyakba tatalokba 1,200 liasü. Iba mapang nungji linük nungi nun aser putir aika linük meindok aser putir 12 pua küm 8 nungi 30 tashi tepuokdak ayutsü obendang agüja liasü.

Haiti nung telok kati putir ka densema Khristan aika puer ao

February 28, 2024: Haiti yimtiba, Port-au-Prince nung prangpong amer telok kati tatalokba balala ana nung Khristan putir ka den Khristan trok puer ao.

February 23 nü Brothers of the Sacred Heart Arogo nungi nisung trok John XXIII School-i aoba mapang nung prangpong amer telok kati puer ao, ta Khristan melungtet telok Aid to the Church in Need (ACN)-i metetdaksü.

"Iba tatalokba dak sendakba nung John XXIII school shibanga atar," ta Arogoi metetdaksü.

Kasa anogo nungjisa Port-au-Prince nung Khristan putir kata puer ao.

Haiti linük nung security kanga majung; prangpong amer telok balalai timtem agütsür. Arogoi kanga meranga inyakaka prangpong amer teloki Arogo lenirtem danga maochir.

Brothers of the Sacred Heart Arogoi sangdong ka

ajanga, "Taochi akasang Tsüngremi timtem metsüh prokertem den jembia temelung meyipdaksütsü aser Haiti nung temeim jungkai adoktsü, ta onoki amanger," ta metetdaksü.

2023 küm prangpong amer telok balalai Haiti nung nisung 4,000 dak tema tepsetogo aser nisung 3,000 shi puer ogo. Ibaji 2022 küm den medemdangra shilem 80 agi teimba liasü.

Haiti nung osettsüset/chiyungtsü jenjang shilem 23 agi teimba kümogo (U.N.'s World Food Program) aser ibaji ajanga nüburtem kanga timtemer.

ACN USA nung outreach director, Edward Clancy-i, "Haiti nung kanga sensakertem tenzüker putirtem aser lenirtemi anogo shia taküm lendong ajurur. Ajisüaka parnoki tasü itta inyakba ajanga Khristantemi temeim mapa inyakba kuli sayur," ta metetdaksü.

"Tesüiba küm aika rara aser ozüing alema inyakba mapatem ajanga Haiti nung tesünep raksatsüogo. Timtemertem atema inyakertem danga taochi mesayur. Tejakleni aoba linüktemi timtemba Haiti nung den longjemdaksüner," ta Brothers of the Sacred Heart Arogoi metetdaksü.

Taküm February 26 nü US sorkari Haiti nung yimjung atema inyaktsü, ta metetdaksüogo.

US sorkarisa senotsü densema teyari balala agütsütsü, ta nangzük.

U.S. ambassador to the United Nations, Linda Thomas-Greenfield-i, UN-i pusema Kenya police force, Haiti-i yoktsü atema US-i inyakdar, ta metetdaksü.

Laisa, US sorkari dollar sen million 200 agütsütsü aser general election matongdang yimjung alitsü atema stakeholders den longjemer inyaktsü, ta metetdaksü.

ANOGO ABEN TSÜNGREM DEN

Temeimi tajungtiba bilemer


Temeimi...ajak azüzüker, ajak amanger, ajak yimlar, ajak aremer. 1 Korint 13:7

Temeim tatakzük mali. Temeimi kodanga mashir, "Na talang ka pilaa ogo. Ni tang na meimtsü makok." "Ajak" tetezü kechisarena dena lir. Khrista mesükba temeimi temulungjang nung tangar dang kecha arendaka mayu maneni meimer. Na anasa alirtem mapa tamajung inyakaka, nai parnok ne temeimi sotta mayur. Parnoka anema kecha tamajung mebilemer.

Temeimi tangar asoshi tajungtiba bilemer. Kari na anema asaa tamajung inyakaka, mapaji asaa inyakba masü ta nai bilemer. Kari na yirutsütsü bushira, nai mapa ajakji aremzüker, tai adoker. Timtem mapang nung teimla agütsüra nai aji agizüker. Kari maneni arütsüra, nai ajakji aremzüker. Nai meimba dak nai kodanga teyimla mesamar. Khristai ne nem agütsüba dak nai maneni kecha jenjang makai meimer.

Pauli ashir, tenem ajungdoktettsüsa pa tamang liaka aji kecha masü, kotak tenyar temeli aser shin o ajak angatetsü sempet liaka, temeim melira aji kecha masü. 1 Korint 13 nung Tsüngremi pei asoshi kecha mebilemi na meimba jungkai adoktsür. Tang iba temeimji na ajanga tangar dang sayutsü Tsüngrem dang sarasademang.

Memphis nung pastor ka injang agi yiru



Pastor Clemmie Livingston Jr

February 28, 2024: February 25 nü Memphis, Tennessee nung auertemi Sunday School tesayur ka meyong gari auyaba nokdangtsü merandang pastor injang agi yiruogo.

Taoba Amongnü aonung New Zionfield Baptist Church indang Facebook page ajanga, "Nenok sarasadem nung Pastor Clemmie Livingston Jr bilemtetang. Tanep ozü Arogo Tenla kima pa dak injang khaloktsü," ta metetdakja liasü.

Osangbener den jembidang Memphis Police Department-i, anepdang tekülem sentong metenzükdang 9:00 ako meta arrshi küm 70, pastor Clemmie Livingston Jr. dak injang khaloktsü, ta metetdaksü.

"Pa Tenla kidang nungi kimai aluba mapang nung nisung kari 2019 silver Chevrolet Corvette gari auyaa liasü. Auertemji gari nungi ajenba mapang nung parnoki pa

dak injang khaloktsü," ta parnokisa metetdaksü.

Anepdang 9:13 ako meta police tonga arudang pastor Livingston kanga mejungi yirur liasü.

Pastor Livingston'er semchir Kavion Woodin-i, "Oboula dak tebang nung injang agi khashi. Iba tatalokba ajanga Memphis nung shinga jenbua mali ta nenshia metetdaksür. Shidakba agibo Tenla ki yabo lendong nungi jenbua aliba tesem ka lir," ta ashi.

Woodin-isa, February 25 nüji Livingston-i "Ano maongka khen," onük jembitsü tebilemba liasü, ta metetdaksü.

"Nisung kari Arogo nung züingsem ka meyong gari auyatsü merang, ibayongji oboula ibaji nokdangtsü meranga liasü. Pai temenen metsübur. Auertem ket nungi gariji kümzüktsü atema pa Tenla kidang nungi kimai alu," ta par semchirisa metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Songtem

(adv) moudaktsü mesüra marudaktsü noktang, inyaka aliba anendaktsü (prevent)

* Tanurtem ayongi oa aliba taintemi songtem.

Songtep

(v) sobaliba yimya nung nü songa ken o jembiba (Customary deliberations with spear jabbing)

*Yim ana ali tzü atema nülak songtepa ken o jembitep.

OLONG PAITEP # 6712

	1			2			3		4
5							6		
7			8						
							9		
		10							
11									12
15									

TIPLÉN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6711 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.

NAI-A YA METETTER MA



2023 küm Japan nung tanur tajemtiba aso aser sorkari birth rate ya 'critical state' ka nung lir ta sangdongogo. Japan nung tanur tajemba asoba ya küm tibuba atongtepa lir aser 2023 küm tanur 758,631 asobaji tesüiba dang nungi 5.1% agi tajemba lir ta Health and Welfare Ministry-i metetdaktsüogo. 1899 nungi Japan nung tanur asoba statistics agia arur aser iba nung tanur tajemtiba asoba kümji yaküm liasü.

Japan nung nütsüng yongsük 125 million tema lir aser 2070 tashi nung 30% shi ajemer 87 million dang akümstü akok ta asadangteta lir.

LoP Saikia-i Rana Goswami dang Congress toktsüba kuli meshir

Guwahati, February 28, 2024

(Agencies): Bodbarnü Assam nung Congress lennir tejan Rana Goswami-i party nungi anenogo aser iba atema Leader of Opposition Debabrata Saikia-i kuli meshiogo.

Goswami-i yimjak nung Congress toktsüba metetdaktsüta ta Saikia-i ashi.

Goswami-i yimjak nung kulitem agütsüba ajanga pai lemtetba jangjashitsü aser Congress party sasep nung inyakyim tajungba akümstü, ta Saikia-isa ashi.

Assam Congress lennir Rana Goswami-i BJP nung adentsü pelashishia jaoker ta Chief Minister Himanta Biswa Sarma-i ashiba sülen anogo ka lir Goswami-i APCC Vice President aser Indian National Congress nung active member nungi anen.

"Ni Assam Pradesh Congress Committee nung working President aser Indian National Congress nung active member nungi anener" ta Goswami-i General Secretary (Organisational) KC Venugopal dangi shidi züluba nung shia lir.

Tesüiba nung Goswami-i BJP nung adentsü akok ta aiben jembiogo aser item ajak nung pai masü ta dang shia aru. Ajisüaka Bodbarnü pai VP menden toktsüba ajanga pai BJP nung adentsü akok ta sayur.

Iba osang zülu tashi nungbo Goswami-i BJP nung adentsü osang kecha mashi lir.

Rana Goswami ya tashitait politician ka lir aser pai BJP nung adentsüba ni pelashishia agizükter ta Mongulbarnü CM Himanta Biswa Sarma-i shia liasü.

SENTSÜWANGSHIDAKI AJUNGKET

Isaia 57:1-2

Temeshipur samar aser nisung shingala temulungjang nung mayur, aser Tsüngrem tsübuba nung bener oadoker, aser shingala tarutsü tamajung nungi temeshipur bener aor ta meshisadanger. 2. Pa tesünepdaki air; Parnok lep nung parnok anisüngzüker, pa temeshi aser tindangba lemangi aor.



Jongmalepden Ao

Asoba 30-6-1946 - Asüba 13-2-2024

Asür Jongmalepdeni toktsüba kinungtsü, Chirnur, Chirnur kinungtsütem, semchirtemi, Pa mapang tatsüka shiranga iba alima nungi pilaa aoba mapang nung onok den sarasadem, tajungshi aser tesüneptsüba o, rongsen aser nebu agi yarigo nenok ajak dang kanga pelaba lemsateper, Tsüngremi nenok mapa tajung asoshi teti temoatsü südakjang ta sarasademtsür.

Kanga pelar:

- 1. NCRC Mkg. and all the Ao NCRC Churches
- 2. Salangdem ward Yimden, Salangdem youth, Salangdem ward Block 4
- 3. Moayimti Union Mkg.
- 4. Lean wolf GYM Mkg.
- 5. Royal Enfield Mkg.
- 6. Moayimti Baptist Arago
- 7. Moayimti Yimden
- 8. Mr. Mrs. Sүngjemkaba Moayimti
- 9. Mr. Mrs. Tsүpongnungba Dmp.

Taoba TIPRA Motha chairman Pradyot Manikya Delhi-i ao

Agartala, February 28, 2024

(Agencies): Taoba Tipra Motha Chairman aser Tripura chuba jabaso Pradyot Kishore Manikya Debbarma-i Bodbar nungi mapang telatet makai lumia lungkak aittsü tenzüker.

Tripura kübok Hatai Kotor (tesüiba Baramura Hills) nung lumitsü tenzüker lia Centre sorkari jaokba atema pa Delhi-i ao.

Pradyot-i sabang nung mener lungkak aittang Leader of the Opposition aser Tipra Motha MLA Animesh Debbarma-i pa nem phone call ka agütsü.

"Ni Delhi-i aotsüsa akümer. Tang phone nung jembiogo. Asenok tangbo mebenjungtsü. Centre sorkari ni Delhi-i arung ta ashir.

Tesüiba nung atalokba ama tangbo mataloktsü. Zübazüba mebilemli, ni Delhi-i aotsü aser parnok den jembitsü" ta Pradyot-i ashi.

"Youth Tipra Federation-i sabang yamai dang yuang. Osang tajung angashira ni iba sabang nungi dang nenok den lemsateptsü" ta paisa ashi.

"Ni tepok tazüng nung Delhi-i aotsü aser osang tajung kecha mangashi tashi ni chijang ka danga machitsü" ta paisa ashi.

"Ni lisopur temoatsü aginür. Ni constitutional solution ka agütsütsü. Delhi nungi phone asüba atema pelar aser parnoki lisopur ola angashiba atema pelar. Ni teka tazüng meyipa marutsü" ta Pradyot-isa metetdaktsü.

Arunachal Pradesh police-i Myanmar nunger 6 apu



Itanagar, February 28, 2024

(Agencies): Arunachal Pradesh ketdangsurtemi international border adena aiter Myanmar nunger 6 puogo.

Nisung 6 ket nung konger seret 6, chibo-aonbo aser Rs 68,000 bena liasü ta Anjaw

district nung Superintendent of Police Riki Kamsi-i ashi.

Iba dak sendakba nung Hawaii police station nung ken o ka benokogo. Parnok ya Putou town nungi lir aser India nung hopta mesüra ita aika amonger, ta pai ashi.

Myanmar sensotemi

konger apetba mapang India lushii aitsü. Iba lenmang ya Indian army-i border patrolling atema amshir, ta Kamsi-isa ashi.

Iba osang Indian Army nem sangoktsüogo aser Strategic Intelligence Branch (SIB) den joint interrogation tenzüker.

Alexei Navalny tasü mang Moscow nung Hokulbarnü aremstsü



Moscow, Tsüklai/February 28 (Agencies): Alexei Navalny tasü mang Moscow nung aliba leper ka nung Hokulbarnü aremstsü, ta odongtar kati shiogo.

Maryino district nung tepila sentong ka agitsü aser iba sülen Borisovskoye Cemetery nung tatembang sentong ya agitsü.

Alexei Navalny ya tan ita tetenzüklen Arctic prison nung ajungbena asü.

Küm aika pa ya Russia Tir Vladimir Putin anemer tejangja liasü. Pa asüba atema Navalny kinungsü Yulia Navalnaya aser alima nung lenir aikati Russia tir tenüng asener.

Navalny asüba kuli tejangja magütsü aser Russian ketdangsürtemi mezüngbo pa tasü mang ya tetsür Lyudmila nem agütsütsü memulungi liasü. Pa sür anogo ti sülen parnoki tasü mang agütsü.

Navalnaya-i Strasbourg nung European Parliament nung jembidang asüpila sentong indang osang tejangja angazüker.

Iba asüpila sentong ya sunepa agitsü asü mesüra Alexei dang tatem salem ashi arurtem police-i aputsü asü masüar mejangja, ta lai ashi.

Navalny indang odongtar Kira Yarmish-i Mongulbarnü ashiba agi, shiba asüba atema tepila sentong agitsüar metetba sülen aokati iba sentong agidaksütsü memulungi liasü.

Navalny'er teloki asüpila sentong ya February 29 nü aginüa liasü, saka iba anogo nisung katia leper metotsütsü ta metet, ta Alexei Navalny's Anti-Corruption Foundation director Ivan Zhdanov-i X nung ashi.

Iba anogo Putin-i Federal Assembly nung küm shia ama o jembitsü lir, ta pai ashi.

"Alexei indang asüpila sentong agiba anogo shingaia Putin asoshi mesüra pai jembiba atema mebilemstsü ta Kremlin-i angateta lir," ta Zhdanov-i sülu.

Pai nüburtem dang Alexei dang tatem salem ashtsü kera arutsü ajungshia liasü.

Tepila sentong ya anepdang agitsü aser iba sülen asüpila sentong ya nikongdang 2:00 ako (par mapang) nung agitsü aser tasü mang ya nikongdang 4:00 ako nung aremstsü.

Arctic Circle nung ajaki majung ta meteta aliba penal colony nung February 16 nü Navalny asüba sülen Russia nung pa asoshi naro yutsüba mechi nisung 400 shi puogo, ta human rights group OVO-Info ajanga ashir.

Hokulbarnü pa asüpila sentong nung police aika alitsü imlar aser nisungtem aputsü akok.

North Korea-i chiyongtsü melena Russia nem injang agütsü: Seoul

Seoul, Tsüklai/February 28 (Agencies): North Korea-i chiyongtsü melena September ita nungi injang million aika bener container 6,700 shi Russia dangi yokogo. Iba den parnoki prangbong injang aser hadir balala yanglutsü atema parts aser raw materials tem yokogo, ta ketdangsürtemi metetdaksü.

South Korean Defense Minister Shin Wonsik-i Mongolbarnü osangbenertem dang ashiba agi, container tem nung ya 152mm artillery shells million asem dak tema mesüra 122mm injang 500,000 abentsü akok.

"Injang anaprongla yoker asütsü akok aser injang million tenetbosa yoker alitsü ta shitettsü," ta Shin-i ashiba Yonhap news agency sangdong ka ajanga metetdaksü.

Ajsüaka minister-i iba osang ya kechi nung angu iba indang memetetdaksü.

Paisa, North Korea nung munitions factory noklang aika parnok indang capacity shilem 30 shi inyaksangshidar, kechiyong parnok raw materials aser electricity agi anünger, ajisüaka Russia atema artillery shell yangluba factory tembo akhi ama kanga junga

inyaksangshidar, ta ashi.

Injang aser hadir balala agütsüba melena Russia-i North Korea nem chiyongtsü, prangbong injang aser hadir balala yangludang amshiba raw materials aser parts tem North Korea nem agütsüdar, ta paisa shisem.

"Russia nungi aruba osettem rongnung chiyongtsü timba arur ama asatetogo, koba North Korea nung chiyongtsü jenjang tajemba kümdaksütsü asoshi asütsü ta amanger aser iba den tanga tenüngdakba osettema yokdar," ta Shin-i ashi.

Maneni pai ashiba agi, Russia nungi North Korea dangi yokba container tem ya Pyongyang-i Moscow dangi yokba dang nungi shilem 30 shi agi tuluba asütsü.

Russia aser North Korea na tsüngda küm ishika tsüngda tesendaktep akangshiogo.

September ita North Korea lenir Kim Jong Un Russia-i oa tir Vladimir Putin den senden ka mena liasü, kong military dak sendakba nung linük ana tsüngda teka amteper inyaksü aser Russia-i Pyongyang satellite programme atema teyari agütsütsü asoshi sensaksema liasü.

Iba sülen South Korea aser United States nati United Nations-i tenokdangba agütsür aliba anema prangbong injang aser hadir balala melentepba atema North Korea aser Russia na aitsüogo aser Ukraine rara nung amshitsü atema Russia nem prangbong injang balala agütsüba atema Pyongyang aitsüogo.

Ajisüaka linük anapronglai iba taitüsüba ya magizük.

Shin-i Mongolbarnü osangbenertem dang ashiba agi, Russia-i satellite dak sendakba nung North Korea nem technology balala agütsür alitsü ta amanger, kechiyong North-i mezüngbuba spy-satellite November ita orbit-i yokogo.

Minister-i ashiba agi, North Korea-i taruba ita tashi nungbo ano satellite ka yoktsü akok aser Pyongyang-i aircraft aser ground mobility equipment technology atema-a teyari meshiogo.

"Russia-i kwika agütsütsü iba indang mejangja, saka North-i Russia nem artillery shells kwika agütsürdi iba dak ajemdaker Russia indang technology tema agütsütsü akok," ta pai ashiba Yonhap-isa metetdaksü.

IMPUR CHRISTIAN HOSPITAL

Impur - 798615, Nagaland

ADVERTISEMENT

Applications are invited for the following post in the Impur Christian Hospital, Impur, Mokokchung. Interested persons are requested to apply with all particulars to the Medical Superintendent Impur Christian Hospital. E-Mail: ichabam2015@gmail.com /whatsapp: ph. 9436015306. The last date for receipt of applications will be 25.03.2024.

Sd/-
Dr. Sashimeren Aier
Chairman
Impur Christian Hospital

AFFIDAVIT

Redg No. 728/15

Date 24/8/15

I, **Smt Sentila Ao**, D/o Bendangtoshi Ao, resident of LRC, H/No. 92, Dist. Dimapur, Nagaland declare that my name is wrongly entered as D. SENTILA AO, D/o DILIP AO, instead of SENTILA AO, D/o. BENDANGTOSHI AO in my academic documents and this refer to one and same person.

From today my name shall be used as **Sentila Ao, daughter of Bendangtoshi Ao** in all my official & correspondence documents.

LAND FOR SALE

Behind Sovima Cricket Stadium

RATE Rs. 490/- per Sq.ft.

ANY SIZE AVAILABLE

- Price Negotiable -

CONTACT
8974020568

NATO nung Sweden züngsem akumtsü Hungary-i mulunger

Budapest, Tsüklai/February 28 (Agencies): NATO nung

Sweden züngsem akumtsü merangba nung bhukuma Hungary indang parliament-i vote agütsüogo, anungji ita 18 dak tema menuba tatem kati arur. Russia-i Ukraine amakba mechi iba alliance ulushitsü merangba nung Hungary-i memulungi NATO züngsem linüktem jashitepa liasü.

Hombarnü vote agitepba nung züngsem 188-i mulung aser troki momulung aser ibai NATO nung Sweden züngsem akumtsü merangba Hungary-i nokdanga aliba tatem kati arur liasü.

Ato Kilonser Viktor Orban indang sorkari NATO nung Sweden züngsem kumdaksütsü asoshi protocol tem July 2022 nung agütsü, ajisüaka tang yimsü tesüdak party nungi ozüng yanglurtemi anema nokdakba mechi parliament nung anendaka liasü.

Linük tasen züngsem akumtsü asoshi NATO züngsem ajungai mulungtsüla aser taoba ita Turkey-i mulungba sülen züngsem 31 aliba alliance nung Hungary ya tesüsaba linüki mulunger alitsü.

Sweden Ato Kilonser Ulf Kristersson-i ibai otsüsütsü anogo ka lir, ta ashi.

"NATO indang security külemi lemsatepa abentsü asoshi ozü tapubang renema lir," ta Kristersson-i X nung zülu.

NATO chief Jens Stoltenberg-ia iba military alliance ya yakta tashi taitba akumtsü ta ashi.

"Tang Allies ajungai agizüker asünung, Sweden ya #NATO Ally 32 buba akumtsü. Sweden züngsem akumba ajanga asenok ajak tashi taitba aser tetsübotsü maliba akumtsü," ta

NATO secretary-general-i X nung zülutsü.

Right-wing populist nungi Orban ya Russia den tesendaktep tajungba akum aser pai ashiba agi, Swedish politician temi Hungary indang democracy aitsüba ajanga linük ana tsüngta tesendaktep mejungi akum aser par Fidesz party nungi ozüng yanglurtemi nungnanga bilem.

Saka Hombarnü vote agitepba ajanga Sweden züngsem akumtsü asoshi tetsükdaksü tatembangba agiener. Russia-i tashi ajak amshia Ukraine amak tenzüker ita ishika sülen May 2022 nung Sweden kidanger Finland ya iba alliance nung adentsü asüngdanga liasü.

Finland-i tetsükdaksü tajemba ajuru aser taoba küm April ita NATO nung züngsem akum.

Sweden atema vote magi tsüngta ozüng yanglurtem den jembidang, "Sweden aser Hungary mitkar tesendaktep aser NATO nung Sweden züngsem akumba ajanga Hungary indang security tashi itshitsü," ta Orban-i ashi.

"Danga linük den külemi NATO züngsem akumtsüba tetetzü kati ka asoshi asütsü renema aliba indang lir. Defence aser military tashi tsütsü tezüngzüktep ka yangluba ajanga linük ana tsüngta tamang yanglurshir," ta Orban-i ashi.

NATO nung Sweden züngsem akumtsü melaba atema tir indang meyongnem nungdaker aser ibaji anogo ishika tsüngta angutsü imlar.

Iba sülen Sweden ya Washington Treaty nung jaoktsü aser NATO indang züngsem 32 buba akumtsü.

Northeast Olympics atema coaching camp tenzükogo



Dimapur, Tsüklai/February 28 (TYO): Taruba 3buba Northeast Olympic Games asoshi State Athletics Team coaching camp ka Indira Gandhi Stadium nung tenzükogo. Iba camp atema high performance training asoshi temaba jenjang nung aliba coach tem nem mapa nongloktsüogo. Asayartem ya Nagaland Olympic & Paralympic Games 2024 nung asayaba dak ajemdaker shimogo.

Athletic Federation of India-i Nagaland atema nongloktsüba coach tema rongnung Om Prakash Karhana (Coach for Throws) densema lir. Pa ya Asian Championship Guangzhou 2010 nung gold medal anguba asayar ka lir aser pa Asian Champion 2009, Asian Indoor Champion 2014, Delhi 2010, Glasgow 2014, Incheon 2014 nung India tenüing nungi shilem agiogo.

Pa ya World Athletics level 2 certified coach ka lir. Pai

Manpreet Kaur nung amala asayar anitetogo, shibai Asian Athletics Championship Bangkok nung bronze medal ngua liasü. Karhana ya tang Indian Olympic Association kübok Athlete Commission züngsem ka lir. Pa tang ONGC kübok inyakdar.

Tanabuba nung I A Shivanand (Coach for Middle & Long Distance) ya taoba mapang India tenüing nungi asayaba asayar ka lir. Pa international asayamung nung 14 ben asayaogo aser iba mapang 5000M Asian Championship gold aser Asian Championship nung 3000M asemtepba nung silver medal nguogo. Paisa National level tetoktepba balala nung otsüsüsüsa gold 28, silver 18 aser bronze medal 14 ngua lir.

Pa ya South Asia Cross Country Championship aser 56buba National Cross Country Championship Nagaland nung asayaba mapang Nagaland team coach asütsü AFI-i shima

liasü aser pa tawabangba kübok team nungi tetsür asaya anati silver medal ngua liasü.

Pai national aser international asayartem aika anitetba tajangshiba bena lir. Pa Maldives team coach asütsü atema-a shimogo. Pa tang Indian Railways Department nung Athletic Coach lir.

Tasembuba nung Deepak Dhillon (Coach for Sprints & Hurdle) lir. Pa ya World Athletics level 2 certified coach ka lir. Pa taoba mapang national jenjang nung asayar ka liasü. Pai Prachi nung amala asaya anitetogo, shibai Asian games nung silver medal ngua liasü. Pa tang Delhi Sports University nung Athletic Coach lir.

Kasa mapang nung Nagaland Athletics-i, Nagaland aser Northeast maneni nongita yariba atema AFI Planning Committee mendenbuba Dr. Lalit Bhanot aser AFI tir Dr. Adille Sumariwala na dang kanga pelaba lemsatepogo.

Iyer aser Kishan na nem BCCI-i contract magütsü

Tsüklai/February 28, 2024 (Agencies): Bodhbarnü 2023-24 season atema BCCI-i annual retainership sangdongba mapang Shreyas Iyer aser Ishan Kishan na nem contract magütsü.

Tena tang asaya aliba Ranji Trophy nung pei state nungi masayaba atema central contract magütsü.

Kishan January ita South Africa nungi meyipa aruba sülen tang tashi khen danga masayai lir. Pa Mumbai Indians captain Hardik Pandya den Baroda nung training agidar, ajisüaka pa Ranji atema Jharkhand team nungi masaya. Iyer-a Ranji nung Assam aser BKC den Mumbai team nungi masaya. BCCI-i Ranji asayatsü atema tetuyuba agüjaka tenati tashi mangaba ajanga tang iba jenjang agiogo.

Rohit Sharma, Virat Kohli, Jasprit Bumrah aser Ravindra Jadeja nung BCCI central contracts nung Grade A+

nung lir. KL Rahul, Shubman Gill, aser Mohammed Siraj nung Grade A category-i ajungketogo.

Kasa mapang nung Rishabh Pant, shiba gari tsükokba lendong nung densema mapang talangka masayai lir pa Grade B-i yokogo.

Team India (Senior Men) indang contract ya 2023 October 1 nungi 2024 September 30 nü tashi atema asütsü.

Asayar shirnok tajemba agi Test 3, ODI 8 mesüra T20I 10 nung asayalir parnok pro-rata basis nung Grade C nung züngoksemsü, ta BCCI-i ashi.

"Dhruv Jurel aser Sarfaraz Khan na Test ana nungbo asayatokogo aser tena Dharamsala nung Test pongububa nung asayara Grade C nung zünoksemsü," ta kasa sangdong ajanga metetdaksü.

Selection committee-isa, Akash Deep, Vijaykumar

Vyshak, Umran Malik, Yash Dayal aser Vidwath Kaverappa nung nem fast bowling contracts agütsütsü benokogo.

Annual contract list:

Grade A+ (4 Athletes)

Rohit Sharma, Virat Kohli, Jasprit Bumrah and Ravindra Jadeja.

Grade A (6 Athletes)

R Ashwin, Mohd. Shami, Mohd. Siraj, KL Rahul, Shubman Gill aser Hardik Pandya.

Grade B (5 Athletes)

Surya Kumar Yadav, Rishabh Pant, Kuldeep Yadav, Axar Patel aser Yashasvi Jaiswal.

Grade C (15 Athletes)

Rinku Singh, Tilak Verma, Ruturaj Gaekwad, Shardul Thakur, Shivam Dube, Ravi Bishnoi, Jitesh Sharma, Washington Sundar, Mukesh Kumar, Sanju Samson, Arshdeep Singh, KS Bharat, Prasidh Krishna, Avesh Khan aser Rajat Patidar.

Dubai Tennis Championships: Bopanna-Ebden aser Yuki-Robin nung quarter-i iogo

Tsüklai/February 28, 2024 (Agencies): Top seeds Rohan Bopanna aser pa indang Australia nung partner Matthew Ebden nati tang asaya aliba Dubai Duty Free Tennis Championships tebur tarep asaya nung Tunisian-Pakistani tarep Skander Mansouri aser Aisam-Ul-Haq Qureshi na koka quarter-i iogo.

Bopanna aser Ebden nati taoba ita Australia Open kokogo aser tenati Mongolbar aonung iba round of 16 asaya nung Mansouri aser Qureshi na 7-6(4), 7-6(5) agi straight set nung koka liasü.

Bopanna aser Ebden na Australian Open akokba sülen tang mezüngbuba asayamung ka nung shilem agir aser tena quarterfinals nung Uruguay nung asayar Ariel Behar aser Czech nung asayar Adam

Pavlesek na den asayatsü. Kasa mapang nung India nungersa Yuki Bhambri aser pa indang Dutch nung partner Robin Haase nati quarterfinals-i iogo. Tenati round of 16 nung Kazakhstan nung Alexander Bublik aser France nung Adrian Mannarino na 6-7(6) 6-3, 10-8 agi koka liasü.

Yuki aser Haase na quarterfinal nung Belgium nung tarep Sander Gille aser Joran Vliegen na mesüra third seed English-Kiwi tarep Jamal Murray o Michael Venus na den asayatsü.

Ajisüaka tia maka India nung asayar Sumit Nagal bo tebur kija asaya round of 32 nung tsükatokogo.

Nagal ya Italy nung asayar Lorenzo Sonego-i 4-6, 7-5, 1-6 agi tsükdakja liasü.

ICC Test rankings: Jaiswal, Gill, Jurel nung tejakdangi tuogo



Yashasvi Jaiswal

New Delhi, Tsüklai/February 28 (Agencies): England den Test asaya pezübuba nung kanga junga asayaba sülen India nung lanur asayar Yashasvi Jaiswal, Shubman Gill, aser Dhruv Jurel nung ICC Test Rankings nung batter tem rongnung tejakdangi tuogo. Iba asaya nung parnok asempronglai half century yanglua liasü.

Test asaya nung batter tem rongnung New Zealand nung asayar Kane Williamson maneni temaba jenjang nung lir aser Ranji nung Test century 31buba yangluba sülen England nung asayar Joe Root tasembubai tuogo.

Tawa sayaba rankings nung Jaiswal jenjang asem tejakdangi tua 12buba, Gill jenjang pezü tejakdangi tua 31buba aser Jurel jenjang 31 tejakdangi tua tang 69buba nung lir.

England nung opener Zak Crawley-a jenjang 10 tejakdangi tua tang 17buba nung lir. India den asayaba mapang pai innings ana nung run 42 aser 60 yanglua liasü. Kasa mapang nung Test all-rounder list nung Root jenjang asem tejakdangi

tua tang pezübuba nung lir.

Bowler tem rongnung India nung asayar Jasprit Bumrah Test pezübuba nung masayaka pa maneni temaba jenjang nung lir. Pa indang teammate Kuldeep Yadav-a jenjang 10 tejakdangi tua 32buba nung lir. Pai England den asayaba mapang tanabuba innings nung wicket pezü agia liasü.

T20I rankings nung Australia nung Mitch Marsh jenjang ana tejakdangi tua tang 15buba nung lir aser all-rounder tem rongnung jenjang 21 tejakdangi tua tang 13buba tongtetogo. Pai New Zealand den asayaba mapang kanga junga asaya liasü.

Travis Head aser Tim David nata batting category nung 19buba aser 21buba nung lir.

Maneni Australia nung bowler Hazelwood T20I bowlers list nung top 10-i ia pa tang tenetbuba nung lir. New Zealand nung Lockie Ferguson-a jenjang 20 tejakdangi tua 29buba nung lir. Pai Australia den asayaba mapang wicket pongu agia liasü.

ODI rankings nung temelenshi kangabo mali, saka Namibia nung Bernard Scholtz aser Gerhard Erasmus na ICC Men's Cricket World Cup League 2 cycle tasenbuba nung junga asayaba sülen tejakdangi tuogo. ODI bowler tem rongnung Scholtz 11buba nung lir aser ODI all-rounders category nung Erasmus trokbuba nung lir.

BILEMDANGANG

"Shir mulungsentsü merek mereka ali parnoki tajung dang inyakner."